

Soluziuns per optimar la catscha speciala

La suprastonza centrala dall'Uniun cantunala dils catschadurs da patenta dil Grischun fa treis propostas

DA HANS HUONDER / ANR

■ **La catscha grischuna stat avon in'impurtonta decisiun, numnadamein la votaziun dil pievel davart l'iniziativa che pertucca la catscha d'atun. Alla radunonza da delegai dall'Uniun cantunala dils catschadurs da patenta dil Grischun dad uonn han las delegadas ed ils delegai da s'exprimer aunc ina ga davart quella.** «Pertucont la damonda davart la catscha d'atun ei igl Uffeci per catscha e pesca dil Grischun staus sturs memia ditg. Apparentamein dat ei catschadurs che vulan ussa dar ina ellas costas agl uffeci. Quei sa esser ina via cun grond potenzial d'in autogol. Metter tut uss en discussiun sa esser malsegir per la catscha da patenta grischuna», di il president dall'Uniun cantunala dils catschadurs da patenta dil Grischun, *Robert Brunold*, enviers il «Catschadur grischun», la gasetta officiala dall'uniun.

Ina correctura

La suprastonza centrala prendi serius ils signals dalla disfidanza. Quei fetschi era il niev cau digl uffeci, *Adrian Arquint*. Ei stoppi esser la finamira da curreger quei che seigi da curreger. L'uniun cantunala hagi adina giu success quei mument che las secziuns ed ils commembers seigien seteni ensemen. «Quella cohesiun duvren nus urgentamein en in temps ch'ils adversaris dalla catscha influenzeschan il mintgadi», puntuescha Brunold. Per quei motiv vul la suprastonza cantunala aunc ina ga ina risposta dallas delegadas e dils delegai: «Nus lein saver sch'ina maiortad dallas 72 secziuns ei per ni encunter l'iniziativa dalla catscha d'atun.»



Il grond diember da tscharvas el cantun Grischun ei plascheivels, mo caschuna era dispetas pertucont sia regulaziun. FOTO E. MONN

Brunold s'exprima el «Catschadur grischun» era davart la tenuta dallas catschadurs e dils catschadurs ella publicitad. Ei hagi num impedir ina tenuta negativa, pertgei ella savessi haver grevas consequenzas era per l'uniun cantunala sco tala. El fa allusiun dallas correcturas ch'ei vegnidas fatgas ils davos onns pertucont il puder sittar dapli tscharvas era il settember. Denter auter numna el l'interrupziun dalla catscha ni era las inter-

venziuns els asils da catscha. Communalamein cun las cundiziuns dall'aura hagi gest quellas gidau a contonscher il settember 2017 in niev record da tscharvas sittadas. Brunold ei perschadiu: «Tonaton drova ei ina catscha d'atun sco instrument regulatori. Ina catscha da reschia sa esser negina alternativa. Ussa sto ei esser la finamira d'analisar ulteriuras pusseivladads per optimar il menaschi dalla catsch'aula e la catscha d'atun.»

Recuors acceptau

L'iniziativa davart la catscha d'atun era vegnida refusada dil cussegl grond. Quella decisiun han ils iniziants buc acceptau ed han recurriu encunter quella tier la dertgira administrativa dil cantun Grischun. Lezza ha dau raschun al parlament cantunal. Il recuors encunter quella decisiun han ils iniziants la finfinala gudignau avon dertgira federala aschia che l'iniziativa sto ussa tuttina

vegnir suttamessa al pievel per decisiun. La motivaziun dalla dertgira federala: «Encunter l'opiniun dalla dertgira administrativa stat l'iniziativa en negina cuntradiziun publica cul dretg surordinau. Ina eventuala regulaziun dalla populaziun dalla selvaschina alla fin dalla catsch'aula ordinaria en rama d'ina catscha d'atun sa era succeder en ina catscha da reschia entras la survigilanza da catscha.»

Sluccar la protecciun dil tshiev cun cruna

Dapi rodund 25 onns protegia il cantun Grischun il tshiev cun cruna. Mo singuls dis astga el vegnir sittaus. Mo era el caschuna donns, per exempel vid igl uaul. Per biars catschadurs eis ei nuncapeivel ch'ins protegia vinavon il tshiev da cruna, schegie che la populaziun da tscharvas crescha ad in crescher. Per quei motiv fa la suprastonza centrala alla radunonza da delegai la proposta da lubir il tshiev da cruna naven digl'emprentothen il tshunavel di dalla catsch'aula. Tenor Brunold ei quei in pass responsabel en vesta alla gronda populaziun da tscharvas dil mument. Ina buna protecciun dil tshiev cun cruna seigi gia dada entras ils asils. In'ulteriura proposta fa la suprastonza centrala en connex cun la catscha d'atun: «Igl Uffeci da catscha e pesca dil cantun Grischun duei far ulteriuras propostas per optimar la catscha d'atun che risguardan ils basegns dalla catscha ellas regiuns. Propostas dallas catschadurs e dils catschadurs duein vegnir risguardadas en quei connex.» La radunonza da delegai ha liug ils 12 da matg 2018 a Sursaiassa.

Cusseglie governativ Christian Rathgeb ha fatg viseta

En Puntreis a Mustér ha el purtau salids als malsaus ed attempai

DA PAUL DUFF / ANR

■ **Per il di dils malsaus ha il representant dalla regenza cantunala Christian Rathgeb visitau la dumengia varda la casa da tgira ed attempai Puntreis a Mustér. Quei gest ei vegnius apprezziaus dils cussadents e cunzun dil personal dalla casa cul menader Diego Deplazes.** *Christian Rathgeb* ha exprimi igl engraziament allas conlucreras ed als conlucrers dalla casa, ils quals stattan cumpleinamein el survetsch dil concarstgaun attempau, malsau ni impedi.

Collaboraziun ella regiun ei da promover

Diego Deplazes, sco meinacasa, e *Clemens Berther*, president dalla Fundaziun Puntreis, han per quella caschun purtau lur quitaus el brat da meinis cul magistrat. La discussiun ei sesplegada sur dils temas personal ed en consequenza sur dil potenzial da collaborar sil sectur da sanadad ella regiun. L'autonomia cantunala en quei impurtont sectur porta disavantatgs arisguard l'acceptanza da diploms da scolaaziun professiunala. Grondas stentas caschuna la recrutaziun da personal diplomau per las casas. Bunas collaboraturas e

buns collaboratur cun la scolaaziun adattada anflan las instituziuns savens egl'exteriur. La collaboraziun ella regiun denter casas da tgira ed attempai purtass migliur e las pretensiuns legalas savessen vegnir garantidas. La regenza cantunala preferescha, tenor Rathgeb, las sligiazions regiunalas e promovta talas collaboraziuns. Cun l'instanza Sana Surselva ei in'organisasiun adattada per la promozion dil sectur gia avon maun. Ina restructuraziun cun metter la peisa sin cooperar ella regiun generass plazzas da lavur e sinergias positivass. Pusseivel ei quella era cun mantener l'autonomia da mintg'instituziun. Ils argu-

ments per la collaboraziun ein pesonts, denton l'iniziativa per anflar sligiazions sto vegnir ord la regiun.

Salid dalla regenza cantunala

Cusseglie governativ Christian Rathgeb ei impressiunau dall'infrastructura dalla casa Puntreis. Allas collaboraturas ed als collaboratur ch'ei en uffeci la dumengia engrazia el per igl engaschament che vegn purtaus cun gronda carezia ed empatia. Ils cussadents apprezzieschan la viseta aschilunsch ch'els percorschan ei realmein. En cuorts discuors dat ei bialas sentupadas. Il magistrat representa sco

um popular. Ina dunna manegia sin siu salid sco cusseglie dil cantun «wer glaubt wird seelig», ella capeva buca tgi che la viseta era ed ils presents han giu la risada.

Sco il president dalla confederaziun *Alain Berset* ha era Rathgeb priu peda per ils carstgauns en tgira e cunzun per las persunas che s'engaschan per il beinstardad ellas. Ella discussiun cul meinacasa *Diego Deplazes* ha el sentiu ils quitaus dils responsabels. El muossa interess e procura per migliur aschilunsch che sia pusseivladad tonscha da realisar entatzei. Nus enconuschin el sco igl um che muenta e stat da plaid.



Cusseglie governativ Christian Rathgeb engrazia al personal per lur engaschament per ils cussadents dalla casa Puntreis.



Ils malsaus ed attempai han retschert in regal dil cusseglie cantunala a caschun dil di dils malsaus.

FOTOS P. DUFF